



Sambanwá

GIYA SA PAGSAMBA KAN BANWAAN NIN DIOS

IKA-XXIX DOMINGO KAN
ORDINARIONG PANAHON
18 Octubre 2020 (Verde) • Taon A

PAGPAPARAROM SA TATARAMON

Rev. Fr. Ruben B. Temporal

May mga tawo na naghahapot bako nin huli ta nangangaipo sinda nin tamang kasimbagan kundi tanganing ikaag sa bitag an saindang hinahapot, tanganing hanapan nin labot o defecto an sarong tawo. Sa satuyang Evangelio, hinapot si Jesus kan mga Pariseos asin kan mga Herodians kun tama na magbayad nin buwis sa mga Romano? Kan panahon ni Jesus an pagbayad nin buwis sensitibong isyu. Para sa kadaklan dae kinakaipohan na magbayad nin buwis sa mga Romano nin huli ta enot na enot bako man talaga nindang pagsasadiri an bilog na daga nin Israel. Asin an sinasabi man sa banal na Kasuratan na dapat sa Mahal na Dios sana kita magin dayupot nin huli Saiya nahaman an gabos asin Siya an may sadiri kan gabos digdi sa kinaban. Alagad an mga tawo nagbabayad ni buwis sa mga Romano nin huli ta takot sinda sa mga Romano. Si tighapot ki Jesus “tricky question” mayo man talaga nin tamang simbag. Dae Niya man puedeng sabihon na iyo o dae nin huli ta both sides igwa nin makontra saiya. Kaya an simbag ni Jesus praktikal. Hinapot Niya giraray an mga tawo kun siisay na pandok an yaon sa moneda? Asin an sabi kan mga tawo, “ki Cesar”. Kun kaya an simbag ni Jesus, “Itao ki Cesar an ki Cesar, asin itao sa Dios an para sa Dios.”

Ipinapahayag po digdi ni Jesus na kita bilang namamanwaan igwa kita nin *dual/doble citizenship*. Nin huli ta namundag kita digdi sa kinaban asin yaon kita nag-iistar digdi sa kinaban boot sabihon mga ciudadano kita kaining kinaban, katakod kaiyan an satuyang mga katongdan asin reponsibilidad sa satuyang banwaan asin sa satuyang sociedad. Alagad dapat man niatong tandaan na an sa satuyang *citizenship* bako lang digdi sa kinaban kundi igwa man kita nin *citizenship* sa Kahadean nin Dios. Dae man sinabi ni Jesus na kun ika nag tatao sa simbahan *exempted* kana na magtao nin buwis sa gobierno, siring man na kun ika nagtatao nin buwis *exempted* ka na man na magtao nin para sa simbahan. An hinahagad satuya ni Jesus iyo na magin kitang honesto asin *transparent* sa ano man na bagay.

An problema po kaya satuya mga tugang, pag sa ngaran na nin kwarta iba na an paniniwala asin disposisyon nin tawo. Mala ngani ta sa simpleng pagtao niato nin limos sa simbahan nin huli ta bakong istrikto asin nin huli ta dae kita inoobligar sa kun pirang *percent* an itatao niato, an iba lugod garo *optional* na sana talaga an pagtao nin limos. An sabi ni Jesus, “Itao sa Dios an para sa Dios.” An hapot ano man lamang daw an naitao na niato sa Dios? Baka hanggan ngunian mayo pa man talaga kitang naitatao para sa Dios apisar na dakul-dakol na inaako hale Saiya. O baka kaya kun magtao man kita para sa Dios pini-pili niato si tada-tada na; si mga *reject* na. mga namomotan kung mga tugang, an kaipohan nin Dios bako man talaga an satuyang kwarta o an satuyang kayamanan, kundi an satuyang puso: *our best Time, Talent and Treasure*. Kun an Mahal na Dios ngani itinatao satuya an *best* para sa satuya, kita man dapat na itao man niato an *best* niato para saiya. “*The more we give, the more we will receive.*”

GIYA SA PAGHOROP-HOROP

1. Kita daw nagin marahay na parasunod ni Cristo, asin man marahay na namamanwaan kan satong nacion?
2. Itinao ko na daw sa Dios an gabos na kaipuhan para sa pagkamoot niya?

RITO SA PAGPOON

Introducion

C — “Responsibilidad sa Dios asin Sociedad.”

An tema kan celebracion niato kan Eucaristia iyo an pag-otob niato kan satuyang katongdan para sa ikarahay kan sociedad asin man para sa kaomawan kan Dios. Lugod an pag-otob niato kan responsibilidad para sa sociedad magin susog man sa tamang moralidad asin kabotan kan Dios. An para sa Dios asin man an para sa sociedad igwa nin pagkakaiba alagad an duwa dai man minakontra sa lambang sarô orog na sa pagpadanay kan tunay na katoninongan, katanosan, asin pagkamoot.

Antifona sa Paglaog (Cf. S 16, 6. 8)

(*Sinasambit kun mayo nin Awit sa Paglaog*)

Nagkurahaw ako saimo, ta naghinanyog ka sako, O Dios; Dongdonga an saimong talinga, asin hinanyoga an mga tataramon ko. Bantayi ako, Kagurangnan, siring sa alinawnaw kan mata; suroga ako sa limpyo kan saimong mga pakpak.

Pataratara (*Tindog*)

P — Sa ngaran kan Ama, asin kan Aki, asin kan Espiritu Santo.

B — Amen.

P — An Kagurangnan mapasaindo.

B — Asin sa saimong espiritu.

Gawe nin Pagsolsol

P — Mga tugang, akoon ta an satong mga kasâlan, tanganing magkanigo kitang magcelebrar kan mga banal na misterio. (*Halipot na pagtoninong*)

Gabos — Nagkukumpisal ako sa Dios na makakamhan, asin saindo, mga tugang, ta nagkasalâ ako nin makuri sa isip, sa tataramon, sa gibo, asin sa kapabayaan: salâ ko, salâ ko, makuring salâ ko. Kaya nangangadyi ako ki Santa Maria, danay na Virgen, sa gabos na Angeles asin Santos, asin saindo, mga tugang, na ako ipamibi sa Kagurangnan tang Dios.

P — Maherak man lugod sato an Dios na makakamhan asin, pakapatawada an satong mga kasâlan, darahon kita sa buhay na daing kasagkoran.

B — Amen.

Kagurangnan, maherak ka

P — Kagurangnan, maherak ka.

B — Kagurangnan, maherak ka.

P — Cristo, maherak ka.

B — Cristo, maherak ka.

P — Kagurangnan, maherak ka.

B — Kagurangnan, maherak ka.

Kamurawayan

Gabos — Kamurawayan sa Dios sa kaitaasan asin sa daga katoninongan sa

mga tawong marahay an boot. Inoomaw mi ika, rinorokyaw mi ika, sinasamba mi ika, pinapamuraway mi ika, pinapasalamat mi ika huli kandakula mong kamurawayan, Kagurangnan na Dios, Hadeng langitnon, Dios Amang makakamhan. Kagurangnan Aking Bogtong, Jesu Cristo, Kagurangnan na Dios, Cordero kan Dios, Aki kan Ama, ika na nagpapara kan mga kasalan kan kinaban, kaheraki kami; ika na nagpapara kan mga kasalan kan kinaban, akoa an samong pakimaherak; ika na nagtutukaw sa too kan Ama, kaheraki kami. Ta ika sana an Banal, ika sana an Kagurangnan, ika sana an Orog Kahalangkaw, Jesu Cristo, kaiba kan Espiritu Santo: sa kamurawayan kan Dios Ama. Amen.

Colecta

P — Mamibi kita. (*Halipot na pagtoninong*)

Dios na makakamhan sagkod pa man, giboha kaming magdanay saimo asin maimbod sa paggibo kan kabotan mo, asin sa paglingkod sa tunay na puso sa kadakulaan mo, Huli ki Jesu Cristong Kagurangnan ni amo, saimong Aki, na kaiba mong nabubuhay asin naghahade, kasarô kan Espiritu Santo, Dios, sa gabos na kapanahonan kan mga panahon.

B — Amen.

LITURGIA NIN TATARAMON

Enot na Babasahon

(Isaias 45,1. 4-6) (*Tukaw*)

An Enot na Babasahon iyo an manonongod sa Dios na nagpahayag na siya sana an tunay na Dios. Minapili siya kan mga maninigo tanganing maglingkod saiya sa banwaan.

Pagbasa sa Libro ni Profeta Isaias

Ini an sabi nin Kagurangnan sa saiyang linahidan, ki Ciro na an toong kamot sakong ginamit tanganing pasukoon an mga banwaan sa atubang niya, hubadon an mga hagkos kan mga hade, tanganing an mga agihan dai na mapinto. Huli sa surogoon ko na si Jacob nin Israel na sakuyang pinili, inapod ko an saimong ngaran. Tinawan taka nin ikaduwang ngaran, minsan ngani dai mo ako midbid, ako an Kagurangnan asin dai nin iba; dai nin ibang Dios kundi ako sana. Hinahagkosan taka, minsan dai mo ako midbid, tanganing maisihan kan mga tawo, poon sa sirangan sagkod sa solnopan, na dai nin ibang Dios kundi ako sana: Ako an Kagurangnan asin dai nin iba.

An Tataramon nin Kagurangnan.

Gabos — **Salamat sa Dios.**

Salmo Responsorio

(Salmo 96, 1. 3. 4-5. 7-8. 9-10)

R — **An Kagurangnan pagsambahon asin pag-omawon.**

1. Bagong awit awiton sa Kagurangnan: awiton sa Kagurangnan, bilog na kinaban. Sabihon sa mga banwaan an saiyang kamurawayan, mga

ngangalasan niya sa bilog na kinaban. (**R**)

2. An Kagurangnan dakula: maninigong omawon, kinatakotan orog sa gabos na Dios: mayong halaga an mga Dios kan mga pagano. An kalangitan gibo kan Kagurangnan. (**R**)

3. Itao sa Kagurangnan mga familia nin banwaan, itao sa Kagurangnan an kamurawayan asin kapangyarihan, itao sa Kagurangnan, an kamurawayan nin saiyang ngaran. Dolot darahon asin lumaog sa saiyang natad. (**R**)

4. Sa saiyang santuario sambahon an Kagurangnan. Matakot kamo sa atubang niya, bilog na kinaban. Irokyaw sa mga banwaan: "An Dios hade!" An kinaban ginibo niyang masarig, dai nayuyugyog, matanos sa hukoman niya an mga banwaan. (**R**)

Ikaduwang Babasahon

(Filipos 4, 12-14. 19-20)

Ipinapasabot satuya kan Ikaduwang Babasahon na maninigo man naggad na magpasalamat sa Dios kun igwa nin sarong komunitas na nag-ako kan Marahay na Baretta asin nagpahiling kan tunay na pagsaksi.

Pagbasa sa Enot na Surat ni San Pablo sa mga taga-Tesalonica.

Surat na hale ki Pablo, Silvano asin Timoteo para sa Simbahan sa Tesalonica na rogaring nin Dios Ama asin ni Jesu Cristong Kagurangnan. Mapasaindo an biyaya sa samong pamibi asin nagpapasalamat kami sa Dios huli saimong gabos. Danay mi man na ginigiromdom sa atubang nin Dios na satong Ama, kun paano ipinapahiling nindo sa gibo an saindang pagtubod, kun paano nagtrabaho kamo huli sa pagkamoot asin nagdadanay sa bagsik kan saindang paglaom ki Jesu Cristo na satong Kagurangnan. Aram mi mga tugang na an Dios namomoot saindo huli ta kan dinara mi saindo an Marahay na Baretta, uminabot saindo bako sana bilang tataramon kundi man bilang kapangyarihan, bilang Espiritu Santo asin bilang bulanos na katunayan.

An Tataramon nin Kagurangnan.

Gabos — **Salamat sa Dios.**

Pagrokyaw (Filipos 2, 15-16) (*Tindog*)

(*Sinasambit kun dai inaawit an Alleluia*)

Alleluia! Magliwanag kamo sa kinaban siring sa mga bitoon na nagkikinang, huli sa tataramon nin buhay na idinolot nindo. Alleluia!

Evangelio

(Mateo 22, 15-21)

Ipinapahayag sa Evangelio na kita gabos igwa nin katongdan na dapat niatong utobon para sa Dios asin man para sa sociedad.

P — ✠ Pagbasa kan Evangelio na Sinurat ni San Mateo.

B — **Kamurawayan saimo, Kagurangnan.**

An mga fariseo nagharale asin nag-orolay kun pano ninda madakop si Jesus sa saiyang mga tataramon. Sinugo ninda ki

Jesu an saindang mga parasunod kaibahan an nagkapirang mga kaapil ni Herodes asin naghapot: "Maestro, aram mi na dai kang tinatago asin an dalan nin Dios tunay mong itinukdo; siring man dai ka natatakot sa kiisay man, huli ta dai ka nin pinapalaen. Sabiha daw samo kun ano an saimong paghona. Tugot daw na magbayad nin buwis ki Cesar o dai?" Aram ni Jesus an saindang maraot na kaisipan, kaya nagsabi: "Mga Hipokrito! Tadaw ta tinutukso nindo ako? Ipahiling nindo an moneda na ibinayad sa buwis." Ipinahiling ninda saiya an sarong denario asin naghapot: "Kiisay ining ladawan asin ining nagsusurat?" Simbag ninda: "Ki Cesar." Sabi ni Jesus sainda: "Kun siring itao nindo ki Cesar an ki Cesar asin an sa Dios an sa Dios."

P — An Marahay na Baretta nin Kagurangnan.

B — **Pag-omaw saimo Cristo.**

Homilia (*Tukaw*)

Pagrokyaw kan Pagtubod (*Tindog*)

Credo Niceno-Constantinopolitano

Gabos — **Nagtutubod ako sa sarong Dios Amang makakamhan, kaggibo kan langit asin daga, kan gabos na nahihiling asin dai nahihiling. Asin sa sarong Kagurangnan na si Jesu Cristo, Bogtong na Aki kan Dios, asin namundag gikan sa Ama bago kan gabos na panahon. Dios na gikan sa Dios, ilaw na gikan sa ilaw, totoong Dios na gikan sa totoong Dios, ipinangaki, dai linalang, saros a pagka-Dios sa Ama: huli saiya nagkaigwa kan gabos. Huli sa satong mga tawo asin huli sa satong kaligtasan naghilig siya hale sa kalangitan.**

(*Sa mga minasunod na tataramon, abot sa asin nanitawo, an gabos minaduko.*)

Asin nani-laman huli kan Espiritu Santo ki Virgen Maria, asin nanitawo. Ipinako pa sa cruz para sato kan panahon ni Poncio Pilato; nagtios sagkod sa kagadanan asin ilinobong, asin kan ikatolong aldaw nabuhay-liwat sosog sa mga kasuratan, asin suminakat sa langit, nagtutukaw sa too kan Ama. Asin mamuraway na mabalik, sa paghukom sa mga buhay asin mga gadan, an saiyang kahadean daeng katapusan. Asin sa Espiritu Santo, Kagurangnan asin kagtao nin buhay: na gikan sa Ama asin sa Aki. Siya kaiba kan Ama asin kan Aki, sabay na sinasamba asin pinapamuraway: siya nagtaram sa paagi nin mga profetas. Asin sa saro, banal, catolico asin apostolicong Simbahan. Nagpapahayag ako nin pagtubod sa sarong bonyag, sa pagpatawad nin mga kasalan. Asin naghahalat ako kan pagkabuhay-liwat nin mga gadan, asin kan buhay sa maabot na panahon. Amen.

Pamibi nin Banwaan

P — Sa satuyang kaluyahan asin pangangaipo, mamibi kita sa Ama, an burabod kan gabos na kapangyarihan na dapat paglingkodan asin sunodon.

R — **Kagurangnan, hinanyoga an samong pamibi.**

1. Tanganing an Santo Papa asin an mga Obispo kan Simbahan magdanay na maigot sa paghanap ninda nin mga bagong paagi nin pagpalakop kan Kahadean kan Dios: mamibi kita sa Kagurangnan. (R)
2. Tanganing an mga may katongdan bilang pamayo asin lingcod nin banwaan magpasakop sa kapangyarihan kan Dios asin dai magmukna asin magpaotob nin mga ley na tumang sa katanosan asin katoninongan: mamibi kita sa Kagurangnan. (R)
3. Tanganing kita, bilang sarong comunidad, magmidbid kan satuyang katongdan bilang namamanwaan kan nasyon asin magin matanos sa satuyang pakikipagkapwa: mamibi kita sa Kagurangnan. (R)
4. Tanganing bilang mga kasangkapan kan pagkamoot ni Cristo, maranga niato an mga naghehelang huli kan sauyang pagmangno asin pangataman: mamibi kita sa Kagurangnan. (R)
5. Tanganing an mga gadan magpahingalo na sa mamomoton na pangataman kan Ama: mamibi kita sa Kagurangnan. (R)

P — O Dios samuyang Ama, bâgoha samo an saimong pagkamoot tanganing mapakumbaba asin dusay kaming maglingkod saimong asin sa kapwa. Huli ki Cristo samong Kagurangnan.

B — Amen.

LITURGIA NIN EUCARISTIA

Ofertorio (Tukaw)

(Kun dai inaawit an Awit sa Pagdolot)

P — Inoomaw ka, Kagurangnan, Dios nin gabos na linalang, huli ta sa saimong pagkamatinao nag-ako kami nin tinapay, na idinodolot mi saimong bunga kan daga asin kan gibo kan mga kamot nin mga tawo, ini magigin para samo tinapay nin buhay.

B — Pag-omawon an Dios sagkod pa man.

P — Inoomaw ka, Kagurangnan, Dios nin gabos na linalang, huli ta sa saimong pagkamatinao nag-ako kami nin arak, na idinodolot mi saimong bunga kan balagon asin kan gibo kan mga kamot nin mga tawo, ini magigin para samo inomon nin kalag.

B — Pag-omawon an Dios sagkod pa man.

P — (Tindog) Magpamibi kamo, mga tugang: tanganing an sako asin an saindong atang maako man lugod kan Dios amang makakamhan.

B — Akoon man lugod kan Kagurangnan an atang sa saimong mga kamot para sa kaomawan asin kamurawayan kan saiyang ngaran, para man sa pakinabang niato asin kan bilog niyang banal na Simbahan.

Pamibi sa mga Dolot

P — Kagurangnan, namimibi kami, warasan samo na sa bilog na isip maglingkod sa saimong mga balaog, tanganing, sa saimong gracia na naglilingin samo, mahugasan kami kan mga misterio man sana, na samong linilingkodan. Huli ki Cristo samong Kagurangnan.

B — Amen.

Prefacio IV sa mga Domingo kan Ordinariong Panahon

An kasaysayan nin kaligtasan

P — An Kagurangnan mapasaindo.

B — Asin sa saimong Espiritu.

P — litaas an mga puso.

B — Initaas mi na sa Kagurangnan.

P — Magpasalamat kita sa Kagurangnan, satuyang Dios.

B — Maninigo asin Dapat.

Totoong maninigo asin dapat, matanos asin nakakaligtas, na danay asin minsan saen magpasalamat kami saimong Kagurangnan, banal na Ama, Dios na makakamhan na daing kasagkoraan huli ki Cristo samong Kagurangnan:

Ta sa pagkamundag binâgo niya an daan na buhay nin tawo, sa pagtios pinarâ niya an samong mga kasâlan, sa pagkabuhay-liwat hale sa mga gadan binugtâk niya an agihan pasiring sa buhay na daing kasagkoraan, sa pagsakat saimong Ama binuksan niya an mga pinto kan kalangitan.

Kaya kaiba kan kadakul-dakul na Angeles asin Santos, nag-aawit kami saimong himno nin kaomawan, daing tapos na nagsasabi:

Gabos — Banal, Banal, Banal an Kagurangnan Dios ni mga Hukbo. An langit asin daga pano kan Saimong kamurawayan. Hosana sa kaitaasan. Paladan an minadigdi sa ngaran kan Kagurangnan. Hosanna sa kaitaasan.

Pamibi sa Eucaristia (Luhod)

P — Misterio kan Pagtubod.

B — An pagkagadan mo, Kagurangnan, ipinapamareta niamo, an Pagkabuhay mo liwat ipinapahayag, sagkod na ika magdatong.

P — Huli saiya, asin kaiba niya, asin sa saiya, saimong Dios Amang makakamhan kasarô kan Espiritu Santo, an gabos na kagalangan asin kamurawayan, sa gabos na kapanahonan kan mga panahon.

B — Amen.

RITO SA PAGCOMUNION

Ama Niamo (Tindog)

P — Natukduan kan mga nakakaligtas na tugon, asin pinatood kan diosnon na kaugalian, nangangahas kitang magsabi:

Gabos — Ama niamo, na yaon sa langit: pabanalon an ngaran mo; magdatong an kahadean mo; mangyari an boot mo sa daga nin siring sa langit. An samong kakanon sa aroaldaw itao mo samuya ngonian, asin patawadon mo kami sa samong mga kasâlan, siring na pinapatawad niamo an mga nagkakasalâ samuya; asin hare kami pagdaraha sa sugot; kundi agawa kami sa maraot.

P — Agawa kami sa gabos na maraot, namimibi kami Kagurangnan; warasan sa mga aldaw niamo an katoninongan, tanganing kaming natabangan kan saimong pagkaherak magin danay na talingkas sa kasâlan asin man ligtas sa gabos na kapurisawan: mantang kami

naghahalat kan maogmang paglaom asin pagdatong kang samong Paraligtas na si Jesu Cristo.

B — Huli ta saimong kahadean, asin an kapangyarihan, siring man an kamurawayan sa mga kapanahonan.

P — Jesu Cristong Kagurangnan, ika na nagsabi sa saimong mga Apostoles: Katoninongan iwinawalat ko saindo, an sakong katoninongan itinatao ko saindo: hare paghilinga an samong mga kasâlan, kundi an pagtubod kan saimong Simbahan; asin papagkanigoa na siya mapatoninong asin magkaboronyog sosog sa saimong kabotan. Ika na nabubuhay asin naghahade sa kapanahonan kan mga panahon.

B — Amen

Pagpahayag kan Katoninongan

P — An katoninongan kan Kagurangnan danay na mapasaindo.

B — Asin sa saimong espiritu.

P — Magpatinaraohan kamo nin Katoninongan

Cordero

Gabos — Cordero kan Dios, na nagpapara kan mga kasâlan kan kinaban: kaheraki kami. Cordero kan Dios, na nagpapara kan mga kasâlan kan kinaban: kaheraki kami. Cordero kan Dios, na nagpapara kan mga kasâlan kan kinaban: tawi kami nin katoninongan.

Pag-alok sa Pagcomunyon (Luhod)

P — Uya an Cordero kan Dios, uya an nagpapara kan mga kasâlan kan kinaban. Paladan an mga inapod sa pamanggi kan Cordero.

Gabos — Kagurangnan bako akong maninigo na ika magdagos sa sakuyang harong: alagad magtaram ka sana, asin an sakong kalag maomayan.

Antifona sa Comunion (Mc 10, 45)

(Sinambit kun mayong Awit sa Comunion)

An Aki nin Tawo nagdatong, tanganing itao an saiyang buhay bilang pagtubos sa dakul.

Pamibi Pakacomunion (Tindog)

P — Mamibi kita. (Halipot na pagtoninong)

Kagurangnan, namimibi kami, giboha kaming magkamit kan mga langitnon na bagay sa pagcelebrar, tanganing matabangan kami kan mga biyaya ngonian, asin matukdoan kami kan mga nagdadananay. Huli ki Cristo samong Kagurangnan.

B — Amen.

Oratio Imperata (Luhod)

Gabos — Dios na samong Ama, minadulok kami saimong pangangaipo. Hinahagad mi saimong pagligtas samo tumang sa pandemia kan Corona Virus na naglalakop ngonian asin nagdadara nin kagadanan.

Minahagad kami kan saimong tabang para sa mga tawong naghingowa sa

pag-adal kan hinalean, kan hiro, asin paglakop kaining pandemia. Giyahan mo an mga kamot asin isip kan mga experto sa salud tangani na sinda man makatabang nin may maninigong kakayahan asin pagmakulog sa mga may helang.

Ipinapamibi man niamo an mga naglilingkod sa banwaan, sa gobyerno asin pribadong agencia, tangani na makahanap sinda nin bulong sa helang na dara kaining pandemia. Ipinapamibi mi man an mga tinamaan na kan helang. Sinda man lugod maumayan tulos. Tawan mo kami ni biyaya na maghingowa para sa karahayan kan gabos asin sa mga nagsasakit.

Ini hinahagad mi huli ki Jesu Cristong Kagurangnan niamo, saimong Aki, na kaiba mong nabubuhay asin naghahade, kasarô kan Espiritu Santo, Dios sa kapanahonan kan mga panahon. Amen.

Divino Rostro, Kaheraki kami.

Nuestra Señora de Peñafrancia, Ipinamibi mo kami.

(Angay man na hagadon an intercesion kan mga Patron kan parokya, simbahan, capilla, o barangay)

RITO SA PAGTATAPOS

Solemneng Bendicion (Tindog) Ordinariong Panahon IV

P — An Kagurangnan mapasaindo.

B — Asin sa saimong espiritu.

P — Iduko an saindong mga payo asin mamibi para sa bendicion nin mahal na Dios. *(Halipot na pagtoninong)*

Bendicionan kamo kan Dios nin gabos na karangahan, asin iwaras sa saindo an katoninongan sa gabos na aldaw kan saindong pagkabuhay.

B — Amen.

P — Ilikay niya kamo sag abos na kahorasaan asin pasarigon an saindong puso sa saiyang pagkamoot.

B — Amen.

P — Papagyamanon niya kamo kan saiyang mga Balaog nin pagtubod, paglaom, asin pagkamoot, nganing an saindong mga gibo sa buhay na ini magdara saindo nin kaogmahan sa buhay na daing kasagkoran.

B — Amen.

P — Bendicionan kamo kan Dios na makakamhan: an Ama, asin an Aki, ✠ asin an Espiritu Santo.

B — Amen.

P — Lakaw kamo sa katoninongan ni Cristo.

B — Salamat sa Dios!



GIYA SA PAGMISA SA SEMANA

Octobre 19, Lunes

Ika-XXIX na Semana sa Ordinariong Panahon, Verde

o Memorial ni San Juan de Brebeuf asin Isaias Jogues, mga Padi, asin Pag-iriba, mga Martires, Pula

o Memorial ni San Pablo de la Cruz, Padi, Puti

Misa — Ika-XXIX na Semana sa Ordinariong Panahon o *Comun nin mga Martires: I. Sa Luwas kan Panahon kan Pascua* – B. Para sa sarong Martir o *Comun nin mga Pastor: III. Para sa mga Pastor* – A. Para sa Nagkapirang Pastor o B. Para sa Sarong Pastor o *Comun nin mga Santos asin Santas: I. Para Gabos na Categoria nin mga Santos* – A. Para sa Nagkapirang Santos.

Mga Babasahon — Ef 2:1-10 | S 100:1-2. 3. 4. 4-5 | Lc 12:13-21

Octobre 20, Martes

Ika-XXIX na Semana sa Ordinariong Panahon, Verde

Misa — Ika-XXIX na Semana sa Ordinariong Panahon

Mga Babasahon — Ef 2:12-22 | S 85:9-10. 11-12. 13-14 | Lc 12:35-38

Octobre 21, Miercoles

Ika-XXIX na Semana sa Ordinariong Panahon, Verde

Misa — Ika-XXIX na Semana sa Ordinariong Panahon

Mga Babasahon — Ef 3:2-12 | Is 12: 2-3. 4. 5-6 | Lc 12:39-48

Octobre 22, Jueves

Ika-XXIX na Semana sa Ordinariong Panahon, Verde

o Memorial ni San Juan Pablo II, Papa, Puti

Misa — Ika-XXIX na Semana sa Ordinariong Panahon o *Comun nin mga Pastor: I. Para sa Papa o sa Obispo.*

Mga Babasahon — Ef 3:14-21 | S 33:1-2. 4-5. 11-12. 18-19 | Lc 12:49-53

Octobre 23, Viernes

Ika-XXIX na Semana sa Ordinariong Panahon, Verde

o Memorial ni San Juan Capistrano, Padi, Puti

Misa — Ika-XXVIII na Semana sa Ordinariong Panahon o *Comun nin mga Pastor: III. Para sa mga Pastor* – B. Para sa Sarong Pastor.

Mga Babasahon — Ef 4:1-6 | S 24:1-2. 3-4. 5-6 | Lc 12:54-59

Octobre 24, Sabado

Ika-XXIX na Semana sa Ordinariong Panahon, Verde

o Memorial ni San Antonio Maria Claret, Obispo, Puti

o Memorial ni Santa Maria Virgen kada-Sabado, Puti

Misa — Ika-XXVIII na Semana sa Ordinariong Panahon o *Comun nin mga Pastor: II. Para sa Obispo o Comun ni Santa Maria Virgen: I. Sa Ordinariong Panahon.*

Mga Babasahon — Ef 4:7-16 | S 122:1-2. 3-4. 4-5 | Lc 13:1-9



sambanwá

GIYA SA PAGESAMBA KAN BANWAAN NIN DIOS Ika-XXIX Domingo kan Ordinariong Panahon • 18 Octubre 2020

MOST REV. ROLANDO J. TRIA TIRONA, OCD, DD, Arzobispo kan Caceres
REV. FR. LUISITO A. OCCIANO, Direktor, Caceres Commission on Communications
REV. FR. GLENN C. RUIZ, Direktor, Commission on Liturgy
REV. FR. ERIC P. BOBIS, In-Charge, Social Media
JOHN PAUL M. AVEN asin **JUAN CARLOS R. MADRID,** Mga Editor

Hinimo asin inandam kan Archidiocesis kan Caceres, sa pangengenot kan Caceres Commission on Communications, asin Commission on Liturgy. Ciudad nin Naga, Pilipinas • 2020